



TEKS UCAPAN

**YB HAJAH AIMAN ATHIRAH BINTI SABU
TIMBALAN MENTERI PEMBANGUNAN WANITA, KELUARGA DAN
MASYARAKAT**

**PROGRAM JERAYAWARA KASIH KPWK
@ADVOKASI ANTIGANGGUAN SEKSUAL NEGERI KEDAH**

**HOTEL GRAND ALORA, ALOR SETAR, KEDAH
2 OKTOBER 2023 (ISNIN) | 11.15 pagi**

Kemas kini 29 September 2023

Bismillahir Rahmanir Rahim

Assalamualaikum Warahmatullahi Wabarakatuh,
Salam Sejahtera dan Salam Malaysia Madani.

(SALUTASI)

LAMPIRAN SALUTASI DISEDIAKAN

(A) **PENDAHULUAN**

1. Alhamdulillah, Segala Puji Bagi Allah SWT, kerana dengan limpah kurniaNya dapat kita berkumpul pada pagi ini dalam **Program Jerayawara Kasih KPWKM @Advokasi Antigangguan Seksual Negeri Kedah.**
2. Pertama sekali, saya ingin menyampaikan setinggi-tinggi penghargaan dan ucapan terima kasih kepada semua Ketua-ketua Jabatan Kerajaan Negeri Kedah dan Kerajaan Persekutuan, badan-badan korporat, pertubuhan bukan

kerajaan (NGO) serta semua rakyat negeri Kedah yang turut hadir pada pagi ini.

3. Sesungguhnya, kehadiran tuan-tuan dan puan-puan pada pagi ini **menunjukkan solidariti, sokongan** serta **kebersamaan dalam menyokong agenda kesejahteraan masyarakat bagi mencapai persekitaran yang selamat dan kondusif untuk semua.**

4. Untuk makluman semua, negeri Kedah ini merupakan negeri yang ke-10 dalam siri jelajah Program Jerayawara Kasih KPWKM @Advokasi Antigangguan Seksual yang diadakan di seluruh negara.

5. Ini merupakan manifestasi komitmen dan usaha berterusan kerajaan melalui Kementerian Pembangunan Wanita, Keluarga dan Masyarakat untuk memperkasakan wanita dan seterusnya mensejahterakan masyarakat agar pembangunan negara lebih seimbang dan mampan selaras dengan konsep Malaysia Madani.

Puan-puan dan tuan-tuan,

6. Isu gangguan seksual bukanlah sesuatu yang baharu. Namun, kini dengan penggunaan media sosial yang meluas oleh masyarakat, gangguan seksual bukan sahaja berlaku secara fizikal tetapi juga dalam talian atau *online*.
7. Walaupun masalah ini bukan perkara yang mudah untuk ditangani, adalah sangat penting dan mustahak untuk kita

menguar-uarkan dan teruskan perbincangan **isu gangguan seksual serta isu jenayah intip dan hendap atau 'stalking'**.

8. Gangguan seksual adalah jenayah. Ia merupakan suatu fenomena negatif yang boleh memberi kesan buruk kepada mangsa dan organisasi.
9. Cabaran utama dalam menangani gangguan seksual ialah usaha memahamkan masyarakat, mendidik para tenaga kerja di semua peringkat kerja di semua peringkat organisasi tentang gangguan seksual itu sendiri.

Hadirin dan hadirat sekalian,

10. Seseorang pelaku mungkin menganggap tindakan mereka sebagai jenaka yang tidak berbahaya atau salah faham. Akibatnya, gangguan seksual berbentuk perkataan atau sentuhan merupakan antara muqaddimah kepada berlakunya jenayah perlakuan seksual yang lebih berat.

11. Normalisasi pelakuan ini **MESTI DIHENTIKAN**. Tiada ruang langsung wajar diberikan kepada gangguan seksual, sama ada secara terang-terangan atau jenaka.
12. Mangsa bukan sahaja terdedah kepada gangguan mental malah kesan negatif lain termasuk trauma dan ketakutan yang berpanjangan.
13. Berdasarkan statistik oleh Polis Diraja Malaysia (PDRM), jumlah kes gangguan seksual meningkat dari **378 kes pada tahun 2020 kepada 506 kes pada tahun 2021**. Walau bagaimanapun, terdapat **sedikit penurunan pada tahun**

2022 iaitu kepada 477 kes. Jumlah kes yang dilaporkan ini adalah melibatkan kedua-dua jantina, lelaki dan wanita.

14. Namun, majoriti mangsa adalah kaum wanita iaitu sebanyak **354 kes pada tahun 2020, 446 kes pada tahun 2021 dan 416 kes pada tahun 2022.** Statistik ini menunjukkan bahawa setiap tahun lebih **90 peratus daripada kes gangguan seksual adalah melibatkan mangsa di kalangan kaum wanita.**

15. Di negeri Kedah, pada tahun 2022, **terdapat 23 kes gangguan seksual di mana 21 kes atau 91 peratus adalah melibatkan gangguan seksual terhadap kaum wanita.**

16. Selain itu, kes gangguan seksual yang melibatkan kanak-kanak juga adalah membimbangkan iaitu berjumlah **35 kes pada tahun 2022 di seluruh negara.** Negeri Kedah juga turut mempunyai kes gangguan seksual yang melibatkan kanak-kanak iaitu sebanyak dua (2) kes.

17. Selain itu, berdasarkan laporan UNICEF Malaysia, pada tahun 2021, sekurang-kurangnya empat peratus (4%) daripada kanak-kanak yang berumur 12 hingga 17 tahun di Malaysia yang menggunakan internet **mengalami ancaman eksploitasi dan penderaan seksual yang jelas dalam talian.**
18. Ini termasuk diperas ugut untuk terlibat dalam aktiviti seksual, imej seksual mereka dikongsi tanpa kebenaran, atau dipaksa untuk melakukan aktiviti seksual melalui janji wang atau hadiah.

19. Oleh itu, gangguan seksual boleh terjadi di mana – mana sahaja, dalam apa jua bentuk dan kepada mana-mana individu tanpa mengira jantina, usia, kaum ataupun agama termasuklah kepada **golongan yang tidak berdaya seperti kanak-kanak.**

Ibu dan bapa yang berada di sini pada hari ini,

20. Kita mesti lebih peka mendengar dan berani bertindak dalam menangani kes gangguan seksual kanak-kanak.

21. Sekarang adalah masa tepat kita menguasai ilmu pendidikan seksualiti, sentuhan selamat, proses akil baligh dan perubahan fizikal anak-anak apabila menginjak dewasa.
22. Jangan berasa bahawa pendidikan seksual datang terlalu awal, kerana penjahat gangguan seksual tidak akan menganggap anak kita terlalu muda.
23. Persekitaran yang harmonis dalam sesebuah keluarga dapat membantu membina kepercayaan agar anak-anak bebas

bersuara dan berkongsi pengalaman harian mereka. Anak-anak perlu dididik supaya dapat membezakan antara sentuhan selamat dan sentuhan tidak selamat.

24. Ibu bapa juga perlu cakna dengan sebarang perubahan pada perilaku anak-anak dan dengan cara ini, ibu bapa dapat mengesan jika berlaku sesuatu yang mencurigakan.
25. Anak adalah amanah Allah S.W.T. Saya akui, cabaran mendidik serta menjaga anak amat sukar di era globalisasi ini. Pencegahan dan pendidikan yang sewajarnya mampu

membina generasi cemerlang demi kesejahteraan negara pada masa akan datang. Biarlah kita menangis sekarang dalam lelah mendidik dan melindungi anak-anak daripada menyesal di kemudian hari.

26. Bak kata pepatah mencegah lebih baik daripada merawat dan Islam juga menganjurkan amal makruf nahi mungkar. Sebagaimana dalam firman Allah SWT, Surah Ali-Imran, ayat 104 iaitu:

وَلْتَكُنْ مِنْكُمْ أُمَّةٌ يَدْعُونَ إِلَى الْخَيْرِ وَيَأْمُرُونَ
بِالْمَعْرُوفِ وَيَنْهَوْنَ عَنِ الْمُنْكَرِ وَأُولَئِكَ هُمُ الْمُفْلِحُونَ

Maksudnya: “Dan hendaklah ada di antara kamu satu puak yang menyeru (berdakwah) kepada kebajikan (mengembangkan Islam) dan menyuruh berbuat segala perkara yang baik, serta melarang daripada segala yang salah (buruk dan keji). Dan mereka yang bersifat demikian ialah orang-orang yang berjaya.” (Surah Ali Imran ayat: 104)

27. Jelas dari inti pati ayat suci ini menyatakan bahawa perbuatan membiarkan amalan mungkar berleluasa dalam masyarakat akan membawa keburukan bukan saja kepada pelakunya, bahkan kepada masyarakat.

28. Justeru, setiap umat Islam bukan sahaja dituntut menjauhi diri dari melakukan perbuatan yang dilarang Allah S.W.T., tetapi juga wajib mencegah perbuatan yang dilarang itu dari merebak dalam masyarakat.

29. Di pihak Kerajaan pula, Kementerian Pembangunan Wanita, Keluarga dan Masyarakat (KPWKM) telah menggubal **Akta Antigangguan Seksual 2022 [Akta 840]**, sebagai suatu **Akta khusus untuk menangani kesalahan gangguan seksual.**

30. Akta ini diharap dapat membantu mangsa untuk tampil melaporkan kejadian gangguan seksual supaya tindakan dapat diambil dengan sewajarnya dan remedi dapat diberikan kepada mangsa.

31. **Penguatkuasaan Akta** ini telah dilaksanakan **secara berperingkat mulai 28 Mac 2023** yang melibatkan takrifan gangguan seksual dan elemen kesedaran, pendidikan serta pemahaman mengenai gangguan seksual kepada masyarakat.

Puan-puan, tuan-tuan, hadirin yang saya kasihi sekalian.

32. Pelaksanaan **Program Jerayawara KASIH KPWKM@Advokasi Antigangguan Seksual** ini bertujuan untuk:

- (i) **Memberikan pendedahan** dan pengetahuan kepada masyarakat mengenai gangguan seksual;
- (ii) **Menyebarkan pemakaian garis panduan** dan notis antigangguan seksual kepada semua lapisan masyarakat;
- (iii) **Menyampaikan maklumat** berkenaan bantuan dan perkhidmatan psikososial yang disediakan oleh KPWKM terutama dalam menangani gangguan seksual; dan

(iv) **Menjalinkan kolaborasi strategik** dengan semua pihak bagi meningkatkan pencegahan dan kesedaran gangguan seksual.

33. Program ini juga bertujuan untuk memberikan kesedaran, pendidikan mengenai gangguan seksual agar **budaya menormalisasikan gangguan seksual dapat dihapuskan.**

34. Inisiatif yang boleh dilakukan termasuk menyediakan platform latihan untuk pekerja sosial dan sukarelawan, serta **meningkatkan pengetahuan pekerja di tempat kerja**

tentang tindakan yang perlu diambil jika ada aduan gangguan seksual.

35. Di samping itu, pelaksanaan ini juga adalah **selaras dengan Akta Kerja 1955 (Pindaan) 2022 yang telah berkuatkuasa pada 1 Januari 2023** yang turut mewajibkan majikan untuk mempamerkan notis mengenai gangguan seksual di tempat kerja.

36. Justeru, KPWKM telah membangunkan **notis antigangguan seksual** yang boleh dimuat turun melalui Kod QR dan laman

web Jabatan Pembangunan Wanita (JPW) untuk dipaparkan di setiap organisasi termasuk premis awam dan swasta.

37. Selain itu, KPWKM juga turut melaksanakan Bengkel Kejurulatihan bagi Anti Gangguan Seksual melalui Institut Sosial Malaysia (ISM). Objektif pelaksanaan bengkel ini adalah untuk:

- (i) **Memberikan kefahaman dan pengetahuan** kepada bakal jurulatih mengenai Akta Antigangguan Seksual 2022 (Akta 840);
- (ii) **Meningkatkan kefahaman dan kemahiran** bakal jurulatih berkaitan isu antigangguan seksual (AGS);
- (iii) **Meningkatkan kefahaman mengenai dinamika pendidikan andragogi** dalam penyampaian ceramah yang berkesan mengenai AGS; dan

(iv) **Menambah baik kaedah penyediaan** instrumen latihan dalam pengajaran dan pembelajaran *Training of Trainers (TOT) AGS*.

38. Bengkel ini dilaksanakan di enam (6) zon yang turut melibatkan zon Utara. Insya Allah, Zon Utara akan diadakan pada Oktober 2023 ini. Bengkel ini mensasarkan seramai 400 orang peserta di seluruh negara. Sebanyak tujuh (7) siri bengkel telah dilaksanakan dan masih berbaki tujuh (7) siri lagi. Justeru, tuan/puan yang berminat boleh mendaftar di reruai pameran ISM yang ada di sini pada hari ini.

39. Selain itu, Program Jerayawara KASIH KPWKM @Advokasi Antigangguan Seksual juga bertujuan untuk menguar-uarkan penyampaian perkhidmatan yang disediakan oleh jabatan dan agensi di bawah Kementerian Pembangunan Wanita, Keluarga dan Masyarakat melalui pelbagai aktiviti dan reruai pameran yang disediakan.
40. Antara jabatan dan agensi di bawah Kementerian yang terlibat adalah Jabatan Pembangunan Wanita, Jabatan Kebajikan Masyarakat, Lembaga Penduduk dan

Pembangunan Keluarga Negara, Institut Sosial Malaysia, Lembaga Kaunseling Negara, dan Yayasan Kebajikan Negara.

41. Turut bersama dengan KPWKM pada hari ini ialah rakan strategik Kementerian seperti Lembaga Zakat Negeri Kedah, Suruhanjaya Syarikat Malaysia, Amanah Ikhtiar Malaysia (AIM), Perbadanan Tabung Pendidikan Tinggi Nasional (PTPTN), Kumpulan Wang Simpanan Pekerja (KWSP), PERKESO, dan lain-lain lagi.

42. Selain itu, terdapat juga gerai-gerai jualan produk-produk daripada usahawan-usahawan wanita di bawah Jabatan Pembangunan Wanita, Jabatan Kebajikan Masyarakat dan Yayasan Kebajikan Negara.
43. Di kesempatan ini, saya juga memohon kepada hadirin sekalian untuk berkongsi maklumat mengenai Advokasi Antigangguan Seksual kepada keluarga, sanak saudara serta rakan-rakan sebagai usaha untuk memberikan kefahaman kepada masyarakat di dalam komuniti kita.

Hadirin yang saya kasihi sekalian.

44. Saya berharap dengan kebersamaan **agensi Kerajaan, sektor korporat, Badan Bukan Kerajaan (NGO) serta seluruh masyarakat untuk untuk bekerjasama** agar kes gangguan seksual akan dapat dibendung dan sekaligus **menyediakan persekitaran yang selamat kepada bukan sahaja wanita malahan lelaki jua termasuk kanak-kanak dan setiap lapisan masyarakat.**

45. Izinkan saya mengakhiri ucapan dengan serangkap pantun:

Jelapang padi indah permai,
Pergi ke sawah menahan pukot,
Agar hidup aman damai,
Gangguan seksual mestilah disekat.

46. Akhir kalam, dengan lafaz “Bismillahir Rahmanir Rahim”, sukacita saya melancarkan **Program Jerayawara KASIH KPWKM @Advokasi Antigangguan Seksual Negeri Kedah.**

Sekian, Wabillahi taufiq walhidayah

Wassalamualaikum warahmatullahi Wabarakatuh.

YB HAJAH AIMAN ATHIRAH BINTI SABU

Timbalan Menteri Pembangunan Wanita, Keluarga dan Masyarakat

2 Oktober 2023